

წინამდებარე „საკრედიტო ლიმიტით სარგებლობის ძირითადი პირობები“ წარმოადგენს ბანკს და კლიენტს შორის გაფორმებული საკრედიტო ლიმიტით სარგებლობის შესახებ ხელშეკრულების არსებით შემადგენელ ნაწილს.

## 1. ტერმინთა განმარტება

- 1.1. „საბარათე ანგარიში“ - ბანკში გახსნილი კლიენტის ანგარიში, რომელზეც დაიშვება საკრედიტო ლიმიტი [„დაშვებული საკრედიტო ლიმიტი“] და აისახება ბანკის მიერ გაცემული საერთაშორისო საგადახდო ბარათით [შემდგომ „ბარათი“] შესრულებული ოპერაციები.
- 1.2. „გახარჯული საკრედიტო ლიმიტი“ - დაშვებული საკრედიტო ლიმიტის საფუძველზე კლიენტის მიერ მიღებული/გადახდილი თანხები და შესაბამისი საკომისიო [განაღების და ა.შ.]. ამასთან, მხარეებისათვის ცნობილია, რომ განაღების საკომისიოს გათვალისწინებით, გახარჯული ლიმიტი შეიძლება აღემატებოდეს დაშვებული ლიმიტის ოდენობას.
- 1.3. „წლიური საპროცენტო განაკვეთი/სარგებელი“ - განისაზღვრება ხელშეკრულებით [იგულისხმება კლიენტის მიერ ხელმოწერილი ხელშეკრულება, რომლის არსებით შემადგენელ ნაწილს წარმოადგენს წინამდებარე პირობები] და არის გახარჯულ საკრედიტო ლიმიტზე დარიცხული პროცენტი, რომელიც გამოითვლება 365 კალენდარულ დღეზე გაანგარიშებით.
- 1.4. „მინიმალური გადასახადი“ - საკრედიტო ლიმიტით სარგებლობისას კლიენტის მიერ გადახდის თარიღამდე გადასახდელი თანხის ოდენობა, რომელიც შეადგენს დაშვებული საკრედიტო ლიმიტის ფარგლებში ბილინგის დღისათვის გახარჯული საკრედიტო ლიმიტის, ხელშეკრულებით განსაზღვრულ პროცენტულ ოდენობას, დარიცხულ საპროცენტო სარგებელს და პირგასამტეხლოს [მათი არსებობის შემთხვევაში]. ამასთან, თუ გახარჯული ლიმიტი აღემატება დაშვებულ ლიმიტს, მინიმალური გადასახდელი სრულად მოიცავს მათ შორის სხვაობას.
- 1.5. „გადახდის თარიღი“ - ბილინგის დღიდან 25-ე დღე. თუ აღნიშნული თარიღი ემთხვევა არასამუშაო დღეს, მაშინ გადახდის თარიღად მიიჩნევა შემდეგი სამუშაო დღე.
- 1.6. „ბილინგის დღე“ - განისაზღვრება მსესხებლის მიერ ხელმოწერილი ხელშეკრულებით.
- 1.7. „ვადაგადაცილება“ - გარემოება, როცა მინიმალური გადასახადი გადახდილი არ იქნება გადახდის თარიღის 22:00 საათამდე.
- 1.8. „სამუშაო დღე“ - წლის ნებისმიერი კალენდარული დღე, გარდა შაბათ-კვირისა და საქართველოს კანონმდებლობით გათვალისწინებული უქმე დღეებისა.
- 1.9. „ვადაგადაცილებული დავალიანება“ - კლიენტის დავალიანება ბანკის წინაშე, რომელიც არ არის დაფარული წინამდებარე პირობით გათვალისწინებული წესით და ვადებში.
- 1.10. „ბარათის ბლოკირება“ - კლიენტის მიერ წინამდებარე პირობების დარღვევისათვის საბარათე ანგარიშზე ოპერაციების წარმოების დროებით შეჩერება [ბარათი თავსდება ლოკალურ სტოპ-სიაში, ხოლო ცალკეულ შემთხვევაში, ბანკის შეხედულებისამებრ - საერთაშორისო სტოპ-სიაში].

## 2. საკრედიტო ლიმიტის დაფარვის წესი

- 2.1. მინიმალური გადასახადის ყოველთვიურად დაფარვა სავალდებულოა გადახდის თარიღამდე<sup>1</sup>, წინააღმდეგ შემთხვევაში კლიენტს დაეკისრება მის მიერ ხელმოწერილი ხელშეკრულებით განსაზღვრული პირგასამტეხლოს გადახდა.

<sup>1</sup> თუ გახარჯული ლიმიტი აღემატება დაშვებულ ლიმიტს, მათ შორის სხვაობის დაფარვის ვალდებულება კლიენტს ეკისრება სხვაობის წარმოშობისთანავე და მისი გადახდის ვალდებულება არ გადავადდება გადახდის თარიღამდე.

- 2.2. თუ კლიენტი შემოიტანს/ჩარიცხავს თანხას საბარათე ანგარიშზე და იმ მომენტისათვის მას გააჩნია დავალიანება [დარიცხული საპროცენტო სარგებელი ან/და პირგასამტეხლო], ბანკი უფლებამოსილია, რომ შემოტანილი/ჩარიცხული თანხები მიმართოს დავალიანების დასაფარად, მიუხედავად იმისა, მოსულია თუ არა გადახდის თარიღი.
- 2.3. გადახდის თარიღამდე კლიენტის მიერ გახარჯული ლიმიტის სრულად დაფარვის შემთხვევაში, საკრედიტო ლიმიტით ნასარგებლებ პერიოდზე გახარჯულ ლიმიტს არ დაერიცხება წლიური საპროცენტო განაკვეთი, წინააღმდეგ შემთხვევაში, კლიენტს გახარჯულ საკრედიტო ლიმიტზე ერიცხება წლიური საპროცენტო განაკვეთი საკრედიტო ლიმიტით სარგებლობის მთელ პერიოდზე. ყოველგვარი ეჭვის გამოსარიცხად, იმისათვის რომ კლიენტს არ დაერიცხოს წლიური საპროცენტო განაკვეთი, დაკმაყოფილებული უნდა იყოს შემდეგი წინაპირობა: გახარჯული ლიმიტი სრულად უნდა იყოს დაფარული გადახდის თარიღის 22:00 საათამდე და ლიმიტის განკარგვა არ უნდა მოხდეს გადახდის თარიღის მეორე დღის 10:00 საათამდე.
- 2.4. ამასთან, თუ საკრედიტო ლიმიტით სარგებლობის დროს დაშვებულ და გახარჯულ საკრედიტო ლიმიტებს შორის წარმოიშვა სხვაობა, აღნიშნულ სხვაობას წარმოშობიდან ყოველ დღეზე დაერიცხება კლიენტის მიერ ხელმოწერილი ხელშეკრულებით განსაზღვრული პირგასამტეხლო.
- 2.5. გადახდის თარიღამდე მინიმალური გადასახადის გადაუხდელობის შემთხვევაში ბანკი უფლებამოსილია განახორციელოს ბარათის ბლოკირება. კლიენტს ეკისრება ბარათის ბლოკირების საკომისიო [ასეთი არსებობის შემთხვევაში]. ბარათის გააქტიურება მოხდება ვადაგადაცილებული დავალიანების სრული დაფარვისთანავე.
- 2.6. გადახდის თარიღიდან 45-ე დღეს მინიმალური გადასახადის გადაუხდელობის შემთხვევაში საკრედიტო ლიმიტი უქმდება. საკრედიტო ლიმიტის გაუქმება ბანკს ანიჭებს უფლებას შეწყვიტოს წინამდებარე პირობებით განსაზღვრული მომსახურება და მოითხოვოს გახარჯული საკრედიტო ლიმიტის, დარიცხული საპროცენტო სარგებლის და პირგასამტეხლოს დაუყოვნებლივი დაფარვა.
- 2.7. თუ ბანკი ცალმხრივად შეწყვეტს საკრედიტო ლიმიტით მომსახურებას, ბანკის მიერ პროცენტის დარიცხვა გრძელდება საკრედიტო ლიმიტის გაუქმების შემდეგ დარჩენილ დავალიანებაზე.
- 2.8. დავალიანების დაფარვისას პირველ რიგში იფარება დაშვებულ და გახარჯულ ლიმიტს შორის არსებულ სხვაობაზე დარიცხული პირგასამტეხლო, შემდეგ დაშვებულ და გახარჯულ ლიმიტს შორის არსებული სხვაობა [მათი არსებობის შემთხვევაში], შემდეგ დარიცხული პირგასამტეხლო, საპროცენტო სარგებელი და ბოლოს გახარჯული საკრედიტო ლიმიტი. აღნიშნული რიგითობა შეიძლება შეიცვალოს ბანკის შეხედულებისამებრ.
- 2.9. დავალიანების დაფარვასთან დაკავშირებით მხარეები თანხმდებიან:
  - 2.9.1. კლიენტი ვალდებულია, რომ გადახდის თარიღისათვის საბარათე ანგარიშზე იქონიოს მინიმალური გადასახადის დასაფარად საჭირო თანხები.
  - 2.9.2. თუ გადახდის თარიღისათვის საბარათე ანგარიშზე არ არის მინიმალური გადასახადის დასაფარად საკმარისი სახსრები, ბანკი უფლებამოსილია [და არა ვალდებული], რომ გადახდის თარიღის შესაბამის დღეს, კლიენტის დამატებითი თანხმობის გარეშე, კლიენტის მიერ ბანკში გახსნილი ნებისმიერი ანგარიშიდან [მათ შორის სადეპოზიტო] ჩამოწეროს წინამდებარე პირობების შესაბამისად წარმოქმნილი ნებისმიერი სახის დავალიანება 2.8 პუნქტით განსაზღვრული რიგითობით. თუ დავალიანების თანხა და ანგარიშებზე რიცხული თანხა სხვადასხვა ვალუტაშია, ბანკი თავად განახორციელებს კონვერტაციას გადახდის თარიღისათვის ბანკის მიერ დადგენილი კომერციული კურსით, კონვერტაციის საკომისიო ეკისრება კლიენტს.
  - 2.9.3. ბანკი უფლებამოსილია და არა ვალდებული, რომ კლიენტის დამატებითი თანხმობის გარეშე, კლიენტის ვადაგადაცილებული დავალიანება ჩამოწეროს კლიენტის მიერ ბანკში გახსნილი ნებისმიერი ანგარიშებიდან [მათ შორის სადეპოზიტო], 2.8 პუნქტით განსაზღვრული რიგითობით. თუ დავალიანების თანხა და ანგარიშებზე რიცხული თანხა სხვადასხვა ვალუტაშია, ბანკი თავად განახორციელებს კონვერტაციას გადახდის თარიღისათვის ბანკის მიერ დადგენილი კომერციული კურსით, კონვერტაციის საკომისიო ეკისრება კლიენტს.
  - 2.9.4. დავალიანების დასაფარად არ შეიძლება იყოს გამოყენებული ანგარიშებზე არსებული ის სახსრები, რომლებიც თავად წარმოადგენენ რაიმე სახის საკრედიტო ლიმიტს. აღნიშნული პირობა

არ ზღუდავს ბანკის უფლებას, რომ კლიენტის დავალიანების დასაფარად გამოიყენოს კლიენტის სხვა ანგარიშზე არსებული ხელმისაწვდომი თანხები.

### 3. მხარეთა უფლება-მოვალეობანი

- 3.1. ბანკი უფლებამოსილია:
  - 3.1.1. კლიენტის განცხადების საფუძველზე მიიღოს გადაწყვეტილება საკრედიტო ლიმიტის გაზრდის ან შემცირების შესახებ.
  - 3.1.2. ცალმხრივად შეაჩეროს/გააუქმოს საკრედიტო ლიმიტი და კლიენტისაგან მოითხოვოს გახარჯული ლიმიტის დაბრუნება მასზე დარიცხულ პროცენტთან და პირგასამტეხლოსთან ერთად, თუ:
    - 3.1.2.1. კლიენტი დაარღვევს წინამდებარე პირობებს.
    - 3.1.2.2. გაუარესდება კლიენტის ფინანსური მდგომარეობა ან ბანკს მიაჩნია, რომ შეიქმნება ამგვარი გარემოების დადგომის საფრთხე.
    - 3.1.2.3. კლიენტის მოქმედება მიმართულია ბანკის მოტყუებისკენ.
    - 3.1.2.4. კლიენტი არ მოახდენს საკრედიტო ლიმიტის უზრუნველყოფას [იპოთეკა, გირავნობა ან თავდებობა], ბანკის შესაბამისი მოთხოვნის შემთხვევაში.
  - 3.1.3. გააუქმოს საკრედიტო ლიმიტი, თუ კლიენტმა 6 თვის განმავლობაში არ ისარგებლა დაშვებული ლიმიტით.
  - 3.1.4. პირველივე ვადაგადაცილებისას განახორციელოს ბარათის [ძირითადი, დამატებითი] ბლოკირება.
  - 3.1.5. უარი განაცხადოს საკრედიტო ლიმიტის გაზრდის შესახებ კლიენტის მოთხოვნის დაკმაყოფილებაზე ან დააკმაყოფილოს მოთხოვნილზე ნაკლები ოდენობით ლიმიტი.
  - 3.1.6. ცალმხრივად მიიღოს გადაწყვეტილება საკრედიტო ლიმიტის გაზრდის შესახებ და კლიენტის მიერ ხელმოწერილი ხელშეკრულებით გათვალისწინებული წესით აცნობოს კლიენტს. კლიენტის მიერ გაზრდილი ლიმიტით სარგებლობის შემდეგ ჩაითვლება, რომ კლიენტი ეთანხმება ბანკის მიერ ლიმიტის გაზრდის შესახებ გადაწყვეტილებას.
  - 3.1.7. ცალმხრივად მიიღოს გადაწყვეტილება საკრედიტო ლიმიტის შემცირების შესახებ და კლიენტის მიერ ხელმოწერილი ხელშეკრულებით გათვალისწინებული წესით აცნობოს კლიენტს. შეტყობინების შემდეგ ბანკი უფლებამოსილია კლიენტის ანგარიშზე არსებული სახსრები მიმართოს ლიმიტის შესამცირებლად.
- 3.2. საკრედიტო ლიმიტით სარგებლობა ასევე წყდება საკრედიტო ლიმიტით სარგებლობის ვადის დამთავრების თარიღის შემდეგ, თუ არ მოხდება სარგებლობის ვადის გაგრძელება.
- 3.3. კლიენტისათვის პროცენტის, პირგასამტეხლოს/საკომისიოს დაკისრება/გადახდევინება წარმოადგენს ბანკის უფლებამოსილებას და არა ვალდებულებას. შესაბამისად, ბანკი უფლებამოსილია არ მიიღოს გადაწყვეტილება კლიენტისათვის მათი სრულად ან ნაწილობრივ დაკისრების შესახებ.
- 3.4. ბანკის ყველა უფლება გულისხმობს კლიენტის შესაბამის ვალდებულებას.
- 3.5. ბანკი ვალდებულია არაუგვიანეს ბილინგის დღის მომდევნო საბანკო დღისა კლიენტს მოკლე ტექსტური შეტყობინების სახით აცნობოს მინიმალური გადასახადის ოდენობა.

### 4. დასკვნითი დებულებები

- 4.1. ბანკს უფლება აქვს შეტყობინება ან სხვა დოკუმენტი გადასცეს კლიენტს ან გაუგზავნოს შეტყობინება/დოკუმენტი [კურიერის ან საფოსტო ორგანიზაციის მეშვეობით] კლიენტის მიერ ხელმოწერილი ხელშეკრულების მე-5 მუხლში მითითებულ მისამართზე ან კლიენტის იმ მისამართზე, რომელიც რეგისტრირებულია საჯარო რეესტრის ეროვნული სააგენტოს მეწარმეთა და არასამეწარმეო [არაკომერციული] იურიდიული პირების რეესტრში/მითითებულია პირადობის დამადასტურებელ დოკუმენტში. შეტყობინება/დოკუმენტი შეიძლება ასევე გაგზავნილ/გადაცემულ იქნეს მე-5 მუხლში

მითითებულ ტელეფონის ნომერზე მოკლე ტექსტური შეტყობინების ფორმით, ფაქსით, ელექტრონული ფოსტით ან სხვა კომუნიკაციის საშუალებით. შეტყობინება/დოკუმენტი შეიძლება ასევე გაგზავნილ/გადაცემულ იქნეს კლიენტის იმ ტელეფონის ნომერზე მოკლე ტექსტური შეტყობინების ფორმით, ფაქსით, ელექტრონული ფოსტით ან სხვა კომუნიკაციის საშუალებით, რომელიც რეგისტრირებულია საჯარო რეესტრის ეროვნულ სააგენტოს მეწარმეთა და არასამეწარმეო [არაკომერციული] იურიდიული პირების რეესტრში. შეტყობინების/დოკუმენტის გაგზავნა ნებისმიერი ამ პუნქტში დათქმული ფორმით ჩაითვლება კლიენტისათვის შეტყობინების ჩაბარებად. შეტყობინების/დოკუმენტის გაგზავნა ბანკის სახელით ბანკის თანამშრომლის მიერ ტელეფონის ნომრიდან მოკლე ტექსტური შეტყობინების ფორმით ან ელექტრონული ფოსტით ზემოაღნიშნულ რეკვიზიტებზე ჩაითვლება კლიენტისათვის შეტყობინების ჩაბარებად.

4.2. შეტყობინება კლიენტის მიერ მიღებულად/ჩაბარებულად ითვლება:

4.2.1. პირადად მიწოდების შემთხვევაში - შეტყობინების ან სხვა დოკუმენტის კლიენტისათვის ჩაბარების დღეს.

4.2.2. კურიერის ან საფოსტო ორგანიზაციის მეშვეობით შეტყობინების ან სხვა დოკუმენტის გაგზავნის შემთხვევაში - კურიერის/საფოსტო ორგანიზაციისთვის ჩაბარების დღიდან მე-5 კალენდარულ დღეს, ან კლიენტისათვის ჩაბარების დადასტურების თარიღის დღეს, რომელსაც უფრო ადრე ექნება ადგილი.

4.2.3. ელექტრონული ფოსტის საშუალებით გაგზავნის შემთხვევაში - კლიენტის ელექტრონული ფოსტის სერვერიდან [მისამართიდან] ბანკის მიერ გაგზავნილი შეტყობინების მიღების შესახებ დასტურის მიღების დღეს ან გაგზავნიდან მომდევნო დღეს, რომელსაც უფრო ადრე ექნება ადგილი.

4.2.4. ნებისმიერი სხვა საშუალებით გაგზავნის შემთხვევაში - გაგზავნის თარიღიდან მეორე დღეს.

4.3. ბანკის შეტყობინება ან სხვა დოკუმენტი კლიენტზე მიღებულად/ჩაბარებულად ჩაითვლება იმ შემთხვევაშიც, თუ ბანკს შეტყობინება დაუბრუნდა გაგზავნილ მისამართზე კლიენტის ადგილსამყოფელის/საცხოვრებელი ადგილის არ არსებობის გამო ან კლიენტი უარს განაცხადებს შეტყობინების ან დოკუმენტის მიღებაზე/ჩაბარებაზე ან თავს აარიდებს მის მიღებას ან ბანკი ელექტრონული ფოსტის მეშვეობით მიიღებს კლიენტის ელექტრონული ფოსტის მისამართის გაუქმების ან არ არსებობის შესახებ შეტყობინებას. თუ მოხდა მე-5 მუხლში მითითებული კლიენტის რომელიმე რეკვიზიტის/საკონტაქტო მონაცემის შეცვლა და ამის შესახებ წერილობით არ ეცნობება ბანკს, შეტყობინება/დოკუმენტი კლიენტის მიერ მიღებულად/ჩაბარებულად ითვლება მითითებულ რეკვიზიტზე/საკონტაქტო მონაცემზე გაგზავნის შემთხვევაშიც. ბანკი არ არის ვალდებული წერილობით შეატყობინოს კლიენტს მისამართის შეცვლის ფაქტი, რადგან კლიენტისათვის ცნობილია, რომ სს “ვითიბი ბანკ ჯორჯიას” სათავო დაწესებულებისა და მისი ფილიალების/სერვის ცენტრების მისამართები ასახულია შემდეგ ვებ-გვერდზე-[www.vtb.ge](http://www.vtb.ge).

4.4. ხელშეკრულების რომელიმე პუნქტის ბათილად ცნობა არ იწვევს მთლიანად ხელშეკრულების ან მისი სხვა პუნქტების ბათილად ცნობას.